

# La Via Svizra

Viandar tras la natira e tras l'istorgia per lung dal Lai d'Uri

■ **La Via Svizra è l'ovra cuminaivla dals chantuns per il giubileum da 700 onns da la Confederaziun (1991). I sa tracta d'ina via da viandar che maina dal Rütli lung il lai d'Uri enfin a Brunnen. Il traject è parti en 26 tschancuns che correspundan en lur successiun a l'entrada dals 26 chantuns svizzers en la Confederaziun.** La fundaziun Via Svizra vegn purtada da tut ils chantuns. Cuntrari a bleras occurrenz da giubileum limitadas ad in termin specific, represchenta la Via Svizra ina regurdanza stabla da la festa da 700 onns Confederaziun. La via duai restar era per las generaziuns vegnintas in lieu da reflexiun e mantegnair viva l'amur per la natira e



l'interess per la patria.

La senda, per part nova, maina enturn il Lai d'Uri. Ella cumenza al Rütli ed ans maina sin l'intschess dal chantun Uri, sur Seelisberg, Bauen, Isleten, Seedorf, Flüelen, Platta da Tell a Sisikon e vinavant sin l'intschess dal chantun Sviz, sur Morschach a Brunnen.

Tut ils 26 chantuns èn represchentads cun in agen tschancun da via. Gronds craps da term marcan la midada dad in chantun a l'auter. La lunghezza dals singuls tschancuns correspunda al dumber d'abitants dal chantun. Mintga Svizra e mintga Svizzer è damai represchentà cun 5 millimeters sin la Via Svizra d'ina lunghezza totala da 34,86 kilometers. La Via Svizra represchenta dentant er in gir simbolic tras l'istorgia da la Confederaziun svizra.

## Dal Rütli enfin Flüelen

**Rütli – Seelisberg – Bauen:** Cun il bastiment cuntanschain nus il Rütli, il lieu commemorativ nazional da la Svizra. Sin l'areal serrà stat la chasa dal Rütli (1869), averta durant il di sco restaurant. La Via Svizra cumenza sin intschess dad Uri, sisum la prada dal Rütli. Ina senda ans maina amunt en direziun nord tras il guaud sumbrivaun dal Rütli. Sur Breitlohn e la staziun da val da la viafier Treib-Seelisberg arrivain nus a Seelisberg cun la baselgia parochiala St. Michael (1935/36). Nus chaminain siador vers l'anteriu grand-hotel Kulm-Sonnenberg (1864) sin 350 meters sur la prada dal Rütli. Gist davant il grand-hotel, a dretga zuppà davos las plantas, stat la chaplutta da peleginadi Maria-Sonnenberg (1667) cun in bel maletg miraculus ed in dals pli vegls zainets da la Svizra (14. tschientaner). En l'Oberdorf da Seelisberg bandunain nus la via principala. La via auta descenda successivamain aval en direziun sid, parallel al Lai d'Uri. Nus giudain ina survista tut speziala sin il lai, sin il Fronalpstock visavi, vers Morschach, Sisikon, Flüelen ed en la cuntrada da l'Uri.

Sper il lajet da Seelisberg, che giascha a dretga giusut nus, muntain nus ina veglia senda da sauma per visitar il chastè Beroldingen sin la collina (construì avant 1500, parita odierna dal 1671) e la chaplutta dal chastè (1546). En quella stat in amuraivel altar cun alas decorà en il stil da la renaschientscha (1680). Enavos sin la via auta cuntanschain nus la regiun Wisig/Hostet. Qua cumenza, sin ina via a stgalims en la sumbriva dal guaud, la descensiun in pau spundiva vers Bauen, enfin al port ed a la staziun da bus. Attracziuns a Bauen èn ils maletgs d'altar dad Johann Michael Feuchtmayer en la baselgia parochiala St. Idda (1808-13) e la chasa Zwysig cun il monument da Pater Alberik Zwysig (1808-1854), il cumponist dal psalm svizzer.

**Bauen – Isleten – Seedorf – Flüelen:** Sin la via tranter il lai ed il grip da l'Oberbauenstock spassegiain nus en direziun sid, tras galarias da grip dals onns tschuncanta. Nus arrivain ad Isleten (fabrica da di-



En viadi sin la Via Svizra. Sguard en direziun da Sisikon, davosvart Flüelen.

FOTO C. SONDEREGGER/SWISS-IMAGE

namit, fundada il 1872 per fabricar la materia explosiva per la construcziun dal tunnel da viafier dal Gottard), pli baud il sulet access davent dal lai vers l'Isenthal. Oz è Isleten in lieu apprezzà dals surfists.

Arrivads a la fin dal Lai d'Uri, ans maina ina via en il vitg da Seedorf. Là sa chatta il chastè A Pro (1558), in chastè circumdà d'in foss d'aua e cun in'exposiziun d'abitadi istoric. El è vegnì construì d'in manader da mercenaris tenor in model savoiard. Plinavant pon ins visitar il museum da minerals, la baselgia parochiala St. Ulrich (tur 13. tschientaner, baselgia 14./17. tschientaner) e la ruina da la tur dals chevaliers da Seedorf (13. tschientaner). Pli davos stat la claustra da las benedicinas St. Lazarus (18. tschientaner).

Nus returnain al lai, chaminain tras la zona protegida dal delta da la Reuss e cuntanschain Flüelen sur il piogn da la Reuss. Flüelen era ina giada in impurtant plaz da transtgariada per glied e rauba sin via sur il Gottard. Attracziuns èn: il fresco «Föhnsturm» dal pictur uranis Heinrich Danioth en la sala da spetga da la staziun, il pitschen chastè Rudenz (14./18. tschientaner) e sper il lai la sculptura da fier «Engirament» da Werner Witschi (creà per l'Expo 1964).

## Da Flüelen a Brunnen

**Flüelen – Chaplutta da Tell – Sisikon:** Nus chaminain vers nord lung la promenada dal lai. Parallel a la lingia da viafier dal Gottard cuntinuain nus sur il Gruonbach

siador vers las galarias da grip imposantas da la via veglia da l'Axen (1865). Aut siador sur il lai giascha il punct panoramic Axen cun ina vista sin las Alps da l'Uri e la Sutsilvania, sin Bauen e sin il Rütli. Davos nus impressiunescha la gripa defurmada e stratifigada dal massiv da l'Axen.

Nus bandunain il cunfin dal cumin da Flüelen e Sisikon e descendain giu sper il lai a la chaplutta da Tell. Il davos tschancun ans maina da la chaplutta da Tell directamain lung il lai fin al port ed a la staziun da Sisikon. Sisikon è la vischnanca la pli settentriunala dal chantun Uri. Ella cunfinescha al chantun Sviz ed è il sulet access per la vischnanca da muntogna Riemenstalden/SZ.

**Sisikon – Morschach:** Lung l'aul chaminain nus siador la Val Riemenstalden enfin a Büeliacher. Suenter ina storta ans maina la senda vinavant amunt, sperasvi al Fronwald, sur il Ried a Tannen. Sur Tannen avain nus cuntanschi il punct il pli aut da quest'excursiun. Il panorama maiestus da las Alps da la Svizra centrala ans accumpogna sin l'entir viadi. La survista impositanta mussa vers Seelisberg sin las muntognas dad Uri e da Sutsilvania, vers ils fils dal Rigi e sur il Lai d'Uri sin la prada dal Rütli e vers Bauen. Al pe dal Fronalpstock maina ina via sur ina prada spundiva, sperasvi a bains purils spargliads enfin a la chaplutta St. Franz-Xaver (1676) a Hinterlauinen. Tar quella pelegineschan ils purs dal conturn ming'onn e rogan per la benedicziun da Dieu per lur muvel, lur terren, lur chasa e curt.

Suenter ina curta etappa che maina levamain aval cuntanschain nus Morschach che giaschia en ina foppa amuraivla. Attracziuns èn: la baselgia parochiala St. Gallus (1509, emprima construcziun gia en il 9. tschientaner) cun stuccaturas rocovi da l'arvieu e maletgs dad Josef Ignaz Weiss (18. tschientaner) sin il palantschieu sura. Sper la baselgia il carner St. Jakobus (1557) cun fragments da vegls frescos recuvrids pir recentamain.

**Morschach – Brunnen:** Nus bandunain il vitg en direziun nord-vest. In'empernaivla spassegiada ans maina siador vers l'Axenstein. Da là davent vai tras il guaud da Morschach, lung la Wasiwand e sperasvi a la Gruebi (veglia susta), giu tar il punct panoramic Chänzeli. Sut nus giascha la batschida dal lai da Brunnen, la finiziun dal Lai d'Uri. A sanestra ves'ins Seelisberg. En direziun dal lai aval s'avra la vista sin il Stanserhorn, il Pilatus, il Bürgenstock e la vart sid dal Rigi.

Tras il guaud dad Ingenbühl maina la via vinavant al Güttsch ed en ina gronda storta oragiu en il center da Brunnen. Du-

rant il temp dals grand-hotels, vers la mesadad dal 19avel tschientaner, è Brunnen daventà in enconuscent lieu da vacanzas. En ils hotels remodernisads sent'ins anc adina in zic da l'atmosfera da lezs temps. La chaplutta federala (1632–35) en il center dal vitg, fundada dal mistral e chavalier Heinrich von Reding, regorda a la brev federala, renovada suenter la battaglia a Morgarten (1315). Il maletg d'altar prezios ha malegià Justus van Egmont, in scolar da Rubens, il 1642.

## Lieus commemorativs al Lai d'Uri

**Rütli:** En il patg federal dal 1291 na vegn numnà ni il Rütli (il pled munta runcada, terren runcà) ni in auter lieu. Il num Rütli sco lieu da scuntrada dals vegls Confederads chat'ins dentant en l'uschenumà Cudesch alv da Sarnen (1470/74). Da là davent gioga il lieu ina rolla impurtanta en l'istorgia da la Confederaziun. L'interess pli vast per questa prada da guaud al Lai d'Uri ha sveglià oravant tut il drama «Guglielm Tell» (1804) da Schiller.

En il decurs dal temp han ins adina puspè provà da far fatschentas cun la «tgina da la Confederaziun». En discussiun stevan differents monuments, in chastè ed a la fin schizunt in grond hotel. L'onn 1859 ha la Societad d'utilitad publica fatg fin cun tuttas speculaziuns: cun ils daners, rinnads principalmain da la giuventetgna da scola svizra, ha la societad cumprà l'intschess ed al ha regalà a la Confederaziun sco proprietad nazionala inalienabla. Da lez temp aveva mintga scolara e scolar contribuì 20 rasps.

Il «Rapport dal Rütli» dal 1940 è bain in dals eveniments ils pli simbolic succedi en quest lieu. Qua ha general Guisan radunà ses 500 uffiziers ils pli auts. El ha communigà la construcziun dal reduit e fatg da savair a l'entir mund la veglia dal pievel svizzer da sa defender cun datschertadad.

**Il crap da Schiller:** Davant la riva spundiva dal Seelisberg s'auza in obelisc da grip liber or da l'aua. Quest monument da 25 meters autezza, numnà pli baud «Mythenstein», è vegnì battegià il 1859 «Schillerstein» en onur dal poet tudestg Friedrich Schiller (1759–1805). Il crap porta l'inscripziun: «Dem Sängers Tells / F. Schiller / Die Urkantone / 1859». Schiller na conuscheva betg sez ils lieus d'acziun da ses drama da Tell. El era sa fundà principalmain sin las notizias da viadi da ses amigt-poet Johann Wolfgang Goethe.


**La chaplutta da Tell:** A Sisikon, sper la platta da Tell, nua che Tell è sigli temp la ditga a terra per mitschar da Gessler, stat la chaplutta da Tell. In'emprima chaplutta duai esser stada erigida gia il 1388. 1589/90 suonda ina segunda construcziun e 1879/80 è vegnida construìda la chaplutta odierna. En la halla averta vers il lai ha l'artist Ernst Stückelberg malegià da 1880–82 quatter gronds frescos. Las scenas impressiunantas da l'istorgia da Tell e dal «Engirament dal Rütli» ha l'artist malegià en il stil da la pictura istorica fitg apprezzada da lez temp. A partir dals onns tschuncanta dal 16avel tschientaner vegn fatg ming'onn in peleginadi sin l'aua a la chaplutta da Tell. Dapi il 1884 numn'ins quest peleginadi uranis «Tellenfahrt». Malgrà ch'ella è blier pli giuvna che las duas autras chapluttas da Tell en la Svizra centrala, è questa la pli conuscenta. Las duas ulteriuras chapluttas da Tell èn situadas a Bürglen, il lieu nativ probabel da Tell, e sper la Giassa chavorgia a Küsnacht am Rigi.

## La presentaziun:

La Via Svizra. Guid cun sis propostas da viandar ed ina gronda carta panoramica. Brunnen 1991.

## Dapli infurmaziuns:

chatta.ch/?hiid=631  
www.chatta.ch



Guid cun sis propostas da viandar ed ina gronda carta panoramica

Cuverta dal guid da viandar.